



Broj: 01-50-1-15-50/09
Sarajevo, 1. aprila 2009.godine

Z A P I S N I K
50. sjednice Predstavničkog doma
Parlamentarne skupštine Bosne i Hercegovine,
održane 1. aprila 2009. godine

Sjednica je počela u 10 sati. Prisustvovalo je 40 poslanika. Opravdano su odsustvovali Salko Sokolović i Jovan Todorović.

Iz Vijeća ministara BiH sjednici su prisustvovali predsjedavajući Nikola Špirić, ministri: Tarik Sadović, Mladen Zirojević, Sredoje Nović i Safet Halilović.

Iz međunarodnih organizacija sjednicu su pratili predstavnici: OHR-a, OSCE-a, EUSR-a i američke ambasade, kao i nevladine organizacije CCI.

Sjednici je prisustvovao i predsjednik Upravnog odbora RTVBiH Nikola Deretić, u dijelu kad se raspravljalo o izvještajima o radu i finansijskoms poslovanju RTV u 2007. godini.

Na početku sjednice, u okviru prethodnih pitanja, predsjedavajući Doma Beriz Belkić informirao je poslanike o aktivnostima na realizaciji inicijativa poslanika i zaključaka Doma, vezano za: Izvještaj o troškovima Predsjedništva BiH (inicijativa Save Erića), materijal vezan za ekonomsko-socijalnu situaciju u BiH u kontekstu globalne ekonomske krize (inicijative poslanika Sadika Bahtića i Slavka Jovičića), zaključak Doma povodom rasprave o hapšenju Vjekoslava Vukovića i zaključak Doma u vezi s pristupanjem ustavnim promjenama, usvojen na prijedlog Kluba SDP-a, povodom rasprave o inicijativi Martina Raguža i Vinka Zorića.

Povodom ovih informacija poslanik Husein Nanić rekao je da je i on prije skoro godinu dana podnio inicijativu da se u dnevni red uvrsti Informacija o spremnosti institucija BiH za provođenje Sporazuma o stabilizaciji i pridruživanju, što je jednoglasno prihvatila i Zajednička komisija za evropske integracije, ali da se to više ne vodi kao obaveza. Zatražio je da se ta njegova inicijativa aktuelizira kako bi se dobio materijal i provela rasprava na Domu.

Predsjedavajući Belkić rekao je da će se pobrinuti da se urgira za dostavljanje informacije koju je tražio Husein Nanić.

Zatim je predsjedavajući dao uvodne napomene u vezi sa izmjenama i dopunama prijedloga dnevnog reda. Obrazložio je skidanje određenih tačaka zbog zahtjeva nadležnih komisija i preformuliranje određenih tačaka zbog negativnih mišljenja komisija. Posebno je upoznao poslanike o skidanju dvije tačke na zahtjev predsjedavajućeg Vijeća ministara BiH, a to su: Izvještaj o radu Vijeća ministara BiH u 2008. godini i Plan aktivnosti na liberalizaciji viznog režima, navodeći kao poseban razlog da se osigura prisustvo svih članova Vijeća ministara BiH prilikom rasprave o ovim tačkama. Predsjedavajući je napomenuo da su izmjene i dopune prijedloga dnevnog reda usaglašene na sjednicama Kolegija i Kolegija Doma u proširenom sastavu, te da su poslanici dobili konačan prijedlog dnevnog reda.

U raspravi o prijedlogu dnevnog reda Momčilo Novaković pokrenuo je inicijativu da se kao tačka dnevnog reda jedne od narednih sjednica uvrsti: Razmatranje položaja, te mjere za poboljšanje položaja građana BiH koji su bili zaposleni i nastanjeni u Republici Hrvatskoj, a u periodu od '91 do '95 godine otpušteni s posla ili protjerani u BiH. Zatražio je da Kolegij ovu inicijativu proslijedi Komisiji, u skladu s Poslovníkom, kao i da se u okviru priprema za raspravu osigura informacija od Vijeća ministara BiH, kao i od Udruženja radnika i invalida rada iz Hrvatske (Republika Srpska) i Udruženja UGOR (Federacija BiH), te da se predstavnici ova dva udruženja pozovu na sjednicu kada se bude raspravljalo o ovoj tački.

Predsjedavajući Belkić konstatirao je da ovo nije prijedlog tačke za ovu sjednicu, već da se radi o inicijativi koja je mogla biti podnesena u okviru poslaničkih pitanja, te da će Kolegij sa inicijativom postupiti u skladu s Poslovníkom.

Nije bilo više rasprave o prijedlogu dnevnog reda.

Predsjedavajući Belkić konstatirao je da 50. sjednica Doma ima sljedeći

DNEVNI RED

1. Usvajanje zapisnika 48. i 49. sjednice Predstavničkog doma;
2. Poslanička pitanja i odgovori;
3. Prijedlog zakona o izmjenama i dopunama Zakona o Agenciji za rad i zapošljavanje BiH (drugo čitanje);
4. Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera (drugo čitanje);
5. Prijedlog zakona o izmjenama i dopunama Zakona o policijskim službenicima (drugo čitanje);
6. Prijedlog zakona o izmjenama i dopunama Zakona o odbrani BiH, s Mišljenjem Zajedničke komisije za odbranu i sigurnost;
7. Prijedlog zakona o izmjenama i dopunama Zakona o službi u Oružanim snagama BiH (prvo čitanje);
8. Prijedlog zakona o izmjenama i dopunama Zakona o Državnoj agenciji za istrage i zaštitu (prvo čitanje);
9. Prijedlog zakona o izmjenama i dopunama Zakona o Graničnoj policiji BiH (prvo čitanje);
10. Prijedlog zakona o graničnoj kontroli (prvo čitanje);
11. Prijedlog zakona o finansijskom lizingu (prvo čitanje);
12. Prijedlog okvirnog zakona o osnovama naučnoistraživačke djelatnosti i koordinaciji unutrašnje i međunarodne naučnoistraživačke saradnje BiH (prvo čitanje);
13. Prijedlog zakona o izmjenama i dopunama Zakona o sportu u BiH, predlađač: Dom naroda, s Mišljenjem Ustavnopravne komisije;
14. Izjašnjavanje Doma o zahtjevu Komisije za saobraćaj i komunikacije za dostavljanje Izvještaja o Prijedlogu zakona o poštama BiH;
15. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma (prijedlog Vijeća ministara BiH);
16. Izvještaj o radu i poslovanju Radiotelevizije BiH za 2007. godinu;
17. Izvještaj o finansijskom poslovanju Radiotelevizije BiH u 2007. godini;
18. Izvještaj o radu komisija Predstavničkog doma za 2008. godinu:
 - a) Ustavnopravne komisije,
 - b) Komisije za vanjske poslove,
 - c) Komisije za vanjsku trgovinu i carine,
 - d) Komisije za finansijske i budžet,
 - e) Komisije za saobraćaj i komunikacije,
 - f) Komisije za ostvarivanje ravnopravnosti spolova;
19. Izvještaj o radu zajedničkih komisija za 2008. godinu:
 - a) Zajedničke komisije za odbranu i sigurnost BiH,
 - b) Zajedničke sigurnosno-obavještajne komisije za nadzor nad radom Obavještajno – sigurnosne agencije BiH,
 - c) Zajedničke komisije za ekonomske reforme i razvoj,
 - d) Zajedničke komisije za evropske integracije,
 - e) Zajedničke komisije za administrativne poslove,
 - f) Zajedničke komisije za ljudska prava, prava djeteta, mlade, imigraciju, izbjeglice, azil i etiku;
20. Izvještaj o radu Ureda za razmatranje žalbi za 2008. godinu;
21. Izvještaj Zajedničke komisije o nastojanju za postizanje saglasnosti o identičnom tekstu Zakona o dopuni Zakona o Javnom radiotelevizijskom sistemu BiH;
22. Informacija o poplavama u Popovom polju, rijeci Krupi i na području Hutovog blata (podnosilac: Ministarstvo vanjske trgovine i ekonomskih odnosa BiH);

23. Dopune u članstvu komisija;

24. Davanje saglasnosti za ratifikaciju:

- a) Sporazuma o naučnotehničkoj saradnji između Vijeća ministara BiH i Vlade Crne Gore,
- b) Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore za 2007. godinu, na osnovu instrumenta za pretpristupnu pomoć, komponenta II – prekogranična saradnja,
- c) Aranžmana između Vijeća ministara BiH i Vlade Republike Koreje vezano za zajam iz sredstava Fonda za unapređenje ekonomske saradnje,
- d) Sporazuma između Vijeća ministara Bosne i Hercegovine i Vlade Republike Bugrske o međunarodnom drumskom prijevozu putnika i roba,
- e) Sporazuma između Kraljevine Belgije i Republike Albanije, Bosne i Hercegovine, Republike Hrvatske, Bivše Jugoslovenske Republike Makedonije, Republike Moldavije, Crne Gore, Republike Srbije i Misije za privremenu upravu UN-a na Kosovu, u ime Kosova, u skladu s Rezolucijom Vijeća sigurnosti UN-a 1224 o privilegijama i imunitetima Sekretarijata Sporazuma o slobodnoj trgovini u Centralnoj Evropi,
- f) Ugovora o izvedbama i fonogramima Svjetske organizacije za intelektualno vlasništvo i
- g) Ugovora o autorskom pravu Svjetske organizacije za intelektualno vlasništvo.

Ad. 1. Usvajanje zapisnika 48. i 49. sjednice Predstavničkog doma

Predsjedavajući Beriz Belkić rekao je da je na 6. strani Zapisnika u okviru 5. tačke dnevnog reda pogrešno naveden rezultat glasanja o amandmanu Vinka Zorića na Prijedlog zakona o izmjenama i dopunama Zaona o državnoj službi u institucijama BiH, tako da umjesto 10 treba upisati 20 glasova „za“, kao i da je greškom izostavljeno navođenje rezultata glasanja o Prijedlogu zakona, što treba ispraviti u Zapisniku.

Nije bilo drugih primjebi na zapisnike.

Prilikom glasanja jednoglasno su usvojeni zapisnici 48. i 49. sjednice, uz primjedbu na Zapisnik 48. sjednice.

Ad. 2. Poslanička pitanja i odgovori

Predsjedavajući Belkić konstatirao je da su od prošle do ove sjednice odgovore na pitanja dobili:

- Rifat Dolić - Od Vijeća ministara BiH, na pitanja postavljena na 42., 44. i 45. sjednici, te od Pravobranilaštva BiH na pitanje postavljeno na 46. sjednici;
- Slavko Jovičić – od Vijeća ministara BiH, na pitanje postavljeno na 44. sjednici;
- Sadik Bahtić – od Vijeća ministara BiH, na pitanje postavljeno na 45. sjednici;
- Halid Genjac - od Ustavnog Suda RS-a, na pitanje postavljeno na 46. sjednici;
- Denis Bećirović - od Vijeća ministara BiH, na pitanje postavljeno na 46. sjednici,
- Husein Nanić - od Federalnog ministarstva energije, rudarstva i industrije, na pitanje postavljeno na 46. sjednici i
- Azra Alajbegović – od Kolegija Doma i od Zajedničke službe Parlamentarne skupštine BiH, na pitanja postavljena na 47. sjednici.

Odgovore na pitanja komentirali su Sadik Bahtić i Halid Genjac.

Nezadovoljan dobivenim odgovorom, Halid Genjac ponovo je postavio pitanje:

„ Zašto Ustavni sud RS-a koji bi trebalo da štiti Ustav RS-a provodi antiustavnu praksu, odnosno zašto Ustavni sud radi po Poslovniku koji ima antiustavne odredbe? Kad će Ustavni sud svoj poslovnik uskladiti sa Ustavom RS-a i šta će biti s odlukama koje su na ovom sudu donesene po antiustavnoj proceduri?“

Postavljena su nova poslanička pitanja i podnesene inicijative, kako slijedi:

Selim Bešliagić:

„Zašto mi u BiH još uvijek nemamo pravilnik o prirodnim izvorskim i mineralnim vodama, odnosno kada ćemo dobiti pravilnik o prirodnim izvorskim i mineralnim vodama? Napominjem da u njima moraju postojati odredbe recipročne odredbama iz istovjetnih pravilnika iz zemalja u okruženju?“

Adem Huskić:

„1. Da li je Vijeće ministara BiH, odnosno Ministarstvo vanjskih poslova BiH preduzelo korake ka sklapanju ugovora sa SAD-om o poreskim olakšicama za građane BiH? Ukoliko nije, kada se planira pokrenuti ovo pitanje?“

„2. Koji su razlozi da je BiH na 119. mjestu u svijetu po uslovima poslovanja, ako znamo da bez investicija nema brzog razvoja zemlje? Da li će se napraviti Mapa puta koja će nas dovesti do povoljnijeg poslovnog ambijenta?“

3. Koliko je registriranih preduzeća na hiljadu stanovnika u BiH, a koliko u zemljama regiona, a koliko u zemljama EU? Malo da se pozabavimo tom statistikom“.

„Pokrećem inicijativu da izglasamo sljedeći zaključak: Zadužuju se zakonodavni i izvršni organi vlasti u BiH da urade vlastite akcione planove za provođenje preporuka iz Kominike-a Upravnog odbora za provođenje mira od 26.3.2009. U prilogu dajem Kominike“.

Sadik Ahmetović:

„Pitanje postavljam Vijeću ministara BiH, a neka ono odredi ministarstva koja imaju nadležnost da mi odgovore na ovo pitanje - Šta je država BiH preduzela da zaštiti građane BiH i njihova ljudska prava“?

Šemsudin Mehmedović:

„Pitam ministra odbrane BiH – Koliko je do sada evidentirano slučajeva neovlaštenih zahtjeva (lica i institucija) za izuzimanjem određene dokumentacije od vaših institucija i u koju svrhu? Koje mjere i radnje ste preduzeli da ne dođe do neovlaštenog pristupa dokumentaciji u vezi s događajima iz neposredne prošlosti BiH, iz Vaše nadležnosti“?

„2.Pitam Vijeće ministara BiH - Koliko je u prethodnom periodu ovog saziva Vijeća ministara BiH i u kojoj instituciji penzionisano službenika ili namještenika, te ponovo vraćeno na iste poslove ili savjetničke pozicije“?

Sadik Bahtić:

„Kada će Vijeće ministara BiH pripremiti tačku dnevnog reda po zaključku ovog parlamenta i Kolegija: „Recesija, globalna finansijska kriza i njeni efekti na ekonomiju u BiH i mjere za prevazilaženje krize“.

„Predlažem ovom parlamentu inicijativu da zaduži Vijeće ministara BiH ili Ministarstvo civilnih poslova BiH da donese odluku ili zaključak da se nogometnoj reprezentaciji BiH iz rezervnog fonda i granta za sport isplati 100.000 KM“.

Husein Nanić:

„1. Pitanje postavljam predsjedniku CIK-a - Na koliko je adresa Centralna izborna komisija BiH na posljednjim općim 2006. i Lokalnim izborima 2008. poslala zahtjeve za glasanje poštom i na koji način CIKBiH dobiva podatke o adresama prebivališta naših građana u inozemstvu?“

2. Kakvo je objašnjenje Centralne izborne komisije BiH da od evidentiranih preko 1,3 miliona naših građana u inozemstvu poštom glasa 41.700 ili 0,7%“?

3. Šta CIKBiH preduzima da se dobije stvarni broj naših građana s prebivalištem van BiH, s pravom glasa poštom, te da se svakom građaninu BiH, koji ima prebivalište van BiH, omogući jedno od osnovnih ljudskih prava da bira, bude biran i da ima pristup izbornom procesu“?

„4. I pitanje ministru vanjske trgovine i ekonomskih odnosa BiH - Da li je BiH pokrenula postupak pristupanja ATA Carnet sporazumu, ako nije, kada će biti potpisan ovaj značajan međunarodni sporazum“?

Vinko Zorić:

„Pitanje postavljam Vijeću ministara BiH – Šta čine institucije BiH s ciljem rasvjetljavanja zločina u i nakon 1945. godine koje su počinili partizani i komunisti, s posebnim naglaskom na identifikaciju žrtava ali i zločinaca u nedavno pronađenim masovnim grobnicama u Vrgorcu i slovenskom rudniku Barbarin - rov kod sela Huda Jama u blizini Laškog“.

Rifat Dolić:

„1. Pitanje ministru finansija i trezora BiH - Da li je istina da je BiH u 2008. godini za odobrene kredite koji nisu stavljeni u korištenje, na ime redovne i kaznene kamate, napravila za BiH dodatnu obavezu od 18 miliona eura, i ako je ovo bar blizu istine, ko je za to odgovoran, šta ste preduzeli i šta preduzimate ili šta ćete preduzeti prema odgovornim za ovako nedopustivo ponašanje“?

2. Drugo pitanje MUP-u Unsko-sanskog kantona i Kantonalnom tužilaštvu u Bihaću - U kojoj je fazi istraga i šta ste sve do sada preduzeli u istrazi i predmetu otkrivanja laboratorije i plastenika u privatnom poslovnom objektu u mjestu Slapnica kod Velike Kladuše, gdje je prošle godine pronađeno preko 2.000 stabala ili saksija sa zasađenom indijskom konopljom “?

Denis Bećirović:

„1. Ja danas postavljam pitanje predsjedavajućem Vijeća ministara BiH da objasni svima nama u Predstavničkom domu, kažem svima nama jer smo to zajedno izglasali, zašto Vijeće ministara BiH još uvijek nije realiziralo jednoglasno usvojenu inicijativu u Predstavničkom domu koja je tražila da Vijeće ministara BiH u roku od tri mjeseca dostavi strategiju za borbu protiv organiziranog kriminala i korupcije u BiH?“

2. Šta je konkretno u posljednjih šest mjeseci učinilo Ministarstvo za ljudska prava i izbjeglice BiH u Vijeću ministara BiH s ciljem pomoći državljaninu BiH Iliji Jurišiću, koji se, evo već 11. maja će biti dvije godine, nalazi u beogradskom zatvoru. S obzirom da je njegovo stanje zdravstveno sve teže, ja bih zamolio i ministra za ljudska prava da nam kaže kakva su njegova najnovija saznanja u vezi s evidentnim kršenjem ljudskih prava ovog državljanina BiH?“

Sead Jamakosmanović:

1. Kada će Ministarstvo vanjskih poslova BiH omogućiti građanima Bosne i Hercegovine koji borave u Holandiji da svoje potrebe i probleme rješavaju u DKP-u, ambasadi i konzulatu, odnosno kada će konzul dolaziti u Holandiju iz Belgije?

2. Drugo pitanje postavljam Ministarstvu civilnih poslova BiH - Da li je počela primjena dobivanja matičnog broja naših građana u inozemstvu elektronskim putem što do sad nije bio slučaj, a zato su stvoreni zakonski uslovi?“

Azra Alajbegović:

„Pitanje postavljam Ministarstvu obrazovanja i nauke Kantona Sarajevo - Kakav će biti odgovor na upit Medicinskog fakulteta Univerziteta u Sarajevu, a vezano za reguliranje statusa nastavnika Medicinskog fakulteta Univerziteta u Sarajevu, zaposlenih u Kliničkom centru Univerziteta u Sarajevu, s obzirom na specifičnosti zakonskog uređenja zaposlenih nastavnika prema Zakonu o visokom obrazovanju, koji je usvojila Skupština Kantona Sarajevo?“

Milorad Živković:

„Kad bih postavio poslaničko pitanje: da li se vrši prisluškivanje i praćenje poslanika i delegata u Parlamentarnoj skupštini BiH, članova Predsjedništva BiH i imenovanih zvaničnika u Vijeću ministara BiH? Ako je odgovor potvrđan, zahtijevam detaljno obrazloženje na osnovu čijeg naloga se prisluškivanje i praćenje vrši i s kojim razlogom, sigurno bih dobio odgovor da se ne prate i ne prisluškuju, ali ipak ću postaviti navedeno pitanje Tužilaštvu BiH i OSABiH, s tim da ću OSA-i uputiti

zahtjev lično i u skladu sa Zakonom o OSA-i i dodatno pitanje koje se nadovezuje na prethodno - Šta navedene ali i druge nadležne institucije čine, činile su ili namjeravaju učiniti da spriječe nelegalno prisluškivanje i praćenje navedenih lica?“

Niko Lozančić:

„Ja ću postaviti tri kratka pitanja Ministarstvu za ljudska prava i izbjeglice BiH:

1. Koliko je predratnih nosilaca stanarskog prava u BiH privatiziralo stanove i koliko je tih stanova prodato nakon otkupa stana?

2. Koliko je onih koji su od 1.1.1992. do 31.12.1995. iz bilo kojih razloga ostali bez posla u javnim poduzećima, elektroprivredama i njihovim organizacionim jedinicama, telekomima i njihovim organizacionim jedinicama, poštama i njihovim organizacionim jedinicama, i koliko je njih nakon potpisa Dejtonskog mirovnog sporazuma, odnosno od 1.1.1996., omogućeno da se vrate na posao u ta javna preduzeća?

3. Koliki je broj istih takvih lica koja su u općinama, odnosno općinskim administracijama, sudovima, tužilaštvima i ministarstvu unutrašnjih poslova i njegovim organizacionim jedinicama ostala bez posla u ovom periodu i koliki je broj onih kojima je nakon 1.1.1996. omogućeno da se vrate na posao u predratna mjesta življenja, odnosno radnog odnosa?“

Na pitanja Denisa Bećirovića odmah su na sjednici odgovorili predsjedavajući Vijeća ministara BiH Nikola Špirić (na prvo pitanje) i ministar za ljudska prava i izbjeglice BiH Safet Halilović (na drugo pitanje).

Denis Bećirović je u vezi s odgovorom predsjedavajućeg izrazio zadovoljstvo što je Vijeće ministara BiH počelo raditi na izradi strategije za borbu protiv korupcije, ali je izrazio i nezadovoljstvo što je on 5-6 mjeseci insistirao na tome, a Vijeće ministara je bilo dužno u roku od tri mjeseca dostaviti strategiju. U vezi s odgovorom ministra Halilovića, rekao je da je u pitanju velika ljudska nepravda prema Iliji Jurišiću i da njegov odgovor na sjednici ne bi komentirao, ali je zamolio ministra za ljudska prava BiH da, zajedno s ministrom pravde BiH, ako je to moguće, u narednih 15 dana sačine jednu cjelovitu informaciju o slučaju Ilije Jurišića.

Ad. 3. Prijedlog zakona o izmjenama i dopunama Zakona o Agenciji za rad i zapošljavanje BiH (drugo čitanje)

Predsjedavajući je uvodnim napomenama podsjetio da je Komisija prihvatila Prijedlog zakona uz usvajanje amandmana koji su postali sastavnim dijelom predloženog zakona, a da u plenarnoj fazi Slavko Jovičić brani pet amandmana koji nisu usvojeni u komisijskoj fazi.

U ime Ustavnopravne komisije govorio je njen predsjedavajući Šefik Džaferović.

Slavko Jovičić obrazložio je svoje amandmane.

Prilikom glasanja, Dom se prvo izjasnio o amandmanima Slavka Jovičića, podnesenim u plenarnoj fazi. Nije usvojen nijedan amandman. Rezultati glasanja su sljedeći:

- Amandman 1. – "za" 10, "protiv" 21, "suzdržano" pet;
- Amandman 2. – "za" 12, "protiv" 20, "suzdržana" četiri;
- Amandman 3. – "za" 10, "protiv" 20, "suzdržana" četiri;
- Amandman 4. - "za" 10, "protiv" 19, "suzdržano" sedam i
- Amandman 5. – "za" 15, "protiv" 17, "suzdržana" četiri poslanika.

Poslije glasanja o amandmanima, sa 34 glasa "za" (Federacija BiH 23, RS 11), jednim "protiv" i jednim "suzdržanim", usvojen je Prijedlog zakona o izmjenama i dopunama Zakona o Agenciji za rad i zapošljavanje BiH u drugom čitanju.

Ad. 4. Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera (drugo čitanje)

Predsjedavajući Belkić je u uvodnim napomenama rekao da je Ustavnopravna komisija također prihvatila Prijedlog zakona iz ove tačke uz usvajanje dva amandmana koji su postali sastavnim dijelom Prijedloga zakona, da u plenarnoj fazi Milorad Živković brani tri amandmana, a da je Drago Kalabić podnio jedan amandman po novim aspektima.

Predsjedavajući Ustavnopravne komisije Šefik Džaferović obrazložio je Izvještaj Komisije.

Milorad Živković i Drago Kalabić obrazložili su svoje amandmane.

U ime predlagača Zakona govorio je pomoćnik ministra pravde BiH Mustafa Bisić.

U raspravi su učestvovali: Šefik Džaferović, Milorad Živković, Drago Kalabić i Selim Bešliagić.

Prilikom glasanja predsjedavajući Belkić obavijestio je Dom da je Milorad Živković odustao od amandmana, a da je podnio prijedlog zaključka. Zatim je dao na glasanje amandman Drage Kalabića.

Amandman nije usvojen. "Za" je glasalo 11, "protiv" 18, "suzdržalo" se sedam poslanika.

Zatim je Dom, sa 35 glasova "za" (Federacija BiH 24, RS 11) i jednim "suzdržanim", usvojio Prijedlog zakona o izmjenama i dopunama Zakona BiH o izvršenju krivičnih sankcija, pritvora i drugih mjera u drugom čitanju.

Poslije usvajanja Zakona predsjedavajući je na glasanje dao prijedlog zaključka koji je podnio Milorad Živković. Zaključak je usvojen sa 34 glasa "za" (Federacija BiH 22, RS 12) i jednim "suzdržanim". Zaključak glasi:

Zadužuje se Ustavnopravna komisija Predstavničkog doma da, po objavljivanju Zakona o izmjenama i dopunama Zakona BiH o izvršenju krivičnih sankcija, pritvora i drugih mjera u „Službenom glasniku BiH“, u najkraćem roku pripremi prečišćeni tekst Zakona BiH o izvršenju krivičnih sankcija, pritvora i drugih mjera, radi otklanjanja svake sumnje u njegovu primjenu.

Ad. 5. Prijedlog zakona o izmjenama i dopunama Zakona o policijskim službenicima (drugo čitanje)

U uvodnim napomenama predsjedavajući je podsjetio da je nadležna komisija Prijedlog ovog zakona prihvatila u predloženom tekstu.

U kraćoj raspravi učestvovao je Adem Huskić.

Prijedlog zakona usvojen je jednoglasno – sa 36 glasova "za" (Federacija BiH 24, RS 12).

Ad. 6. Prijedlog zakona o izmjenama i dopunama Zakona o odbrani BiH, s Mišljenjem Zajedničke komisije za odbranu i sigurnost

Predsjedavajući Belkić je u uvodnim napomenama podsjetio da je Zajednička komisija za odbranu i sigurnost dostavila negativan izvještaj, tj. da nije prihvatila principe predloženog zakona i da se Dom izjašnjava o Mišljenju Komisije.

U ime Komisije, kratko je govorio Adem Huskić.

Prilikom glasanja, "za" Mišljenje Komisije glasalo je 11, "protiv" 25 poslanika.

Predsjedavajući je konstatirao da nije usvojeno Mišljenje Komisije i da se Prijedlog zakona o izmjenama i dopunama Zakona o odbrani BiH vraća Komisiji radi ponovnog razmatranja i dostavljanja novog mišljenja.

Ad. 7., 8. i 9.

Poslije kraćih uvodnih napomena predsjedavajućeg, o prijedlozima zakona iz ovih tačaka nije bilo rasprave. Prilikom glasanja usvojeni su u prvom čitanju:

- Prijedlog zakona o izmjenama i dopunama Zakona o službi u Oružanim snagama BiH – "za" glasalo 35 (Federacija BiH 23, RS 12), "suzdržao" se jedan poslanik;
- Prijedlog zakona o izmjenama i dopunama Zakona o Državnoj agenciji za istrage i zaštitu – "za" glasalo 34 (Federacija BiH 22, RS 12), "suzdržala" se dva poslanika i
- Prijedlog zakona o izmjenama i dopunama Zakona o Graničnoj policiji BiH – "za" glasalo 35 (Federacija BiH 23, RS 12), "suzdržao" se jedan poslanik.

Ad. 10. Prijedlog zakona o graničnoj kontroli (prvo čitanje)

U uvodnim napomenama predsjedavajući Belkić rekao je da je Komisija, nakon nekoliko negativnih mišljenja, ovog puta podržala principe Prijedloga zakona.

O Prijedlogu zakona diskutirao je Mirko Okolić, a na njegovu diskusiju kratko su odgovorili Beriz Belkić i Adem Huskić.

Prilikom glasanja, "za" Prijedlog zakona glasalo je 26 (Federacija BiH 24, RS dva), "protiv" osam, "suzdržala" su se dva poslanika. Zbog nedostatka entitetske većine, odmah je provedeno usaglašavanje u Kolegiju kao komisiji i nije bilo saglasnosti. U drugom krugu glasanja "za" Prijedlog zakona glasalo je 26, "protiv" 10 poslanika iz Republike Srpske, što je dvije trećine iz entiteta.

Predsjedavajući je konstatirao da je Prijedlog zakona o graničnoj kontroli odbijen u prvom čitanju.

Ad. 11. Prijedlog zakona o finansijskom lizingu (prvo čitanje)

U uvodnim napomenama predsjedavajući Belkić podsjetio je na Mišljenje nadležne komisije o principima i zaključak Komisije – da se o Prijedlogu zakona provede javna rasprava.

U raspravi su učestvovali: Momčilo Novaković, Ekrem Ajanović, Bajazit Jašarević, Velimir Jukić, Sadik Bahtić i Beriz Belkić.

Prilikom glasanja ni Prijedlog ovog zakona nije dobio entitetsku većinu – "za" je glasalo 25 (Federacija BiH 23, RS dva), "protiv" devet, "suzdržao" se jedan poslanik. Nakon usaglašavanja u Kolegiju kao komisiji (nije bilo saglasnosti), u drugom krugu glasanja "za" Prijedlog zakona glasalo je 26, "protiv" 10 – iz Republike Srpske, što je dvije trećine iz entiteta.

Predsjedavajući je konstatirao da Prijedlog zakona o finansijskom lizingu nije usvojen u prvom čitanju.

Ad. 12. Prijedlog okvirnog zakona o osnovama naučnoistraživačke djelatnosti i koordinaciji unutrašnje i međunarodne naučnoistraživačke saradnje BiH (prvo čitanje)

Poslije kraćih uvodnih napomena predsjedavajućeg Doma Beriza Belkića, o Prijedlogu ovog zakona vođena je duža rasprava u kojoj su učestvovali: Husein Nanić, Azra Alajbegović, Momčilo Novaković, Selim Bešlić, Ekrem Ajanović, Branko Dokić, Azra Hadžiahmetović, Mehmed Suljkanović i Zlatko Lagumdžija. Poslije rasprave poslanika, u ime predlagača Zakona, govorio je ministar Sredoje Nović.

Prijedlog zakona usvojen je sa 33 glasa "za" (Federacija BiH 24, RS devet), dva "protiv" i jednim "suzdržanim".

Ad.13. Prijedlog zakona o izmjenama i dopunama Zakona o sportu u BiH – predlagač: Dom naroda, s Mišljenjem Ustavnopravne komisije

U uvodnim napomenama predsjedavajući Beriz Belkić podsjetio je na Mišljenje Ustavnopravne komisije, koja je utvrdila valjan ustavnopravni osnov, ali nije podržala principe Prijedloga zakona iz ove tačke.

U ime predlagača, Prijedlog zakona obrazložio je Ivo Miro Jović, delegat u Domu naroda Parlamentarne skupštine BiH.

U raspravi su učestvovali: Martin Raguž, Momčilo Novaković, Azra Hadžiahmetović, Velimir Jukić, Milorad Živković i Ivo Miro Jović.

Prilikom glasanja nije usvojeno Mišljenje Ustavnopravne komisije o principima Prijedloga zakona. "Za" Mišljenje je glasao 21 poslanik (Federacija BiH 19, RS dva), "protiv" je glasalo 15 poslanika. Nakon usaglašavanja u Kolegiju kao komisiji, u drugom krugu glasanja "za" Mišljenje je glasao 21 poslanik, "protiv" 15, pri čemu je iz Republike Srpske "protiv" bilo 10, što je dvije trećine iz entiteta.

Predsjedavajući Belkić konstatirao je da Mišljenje Ustavnopravne komisije nije usvojeno i da se Prijedlog zakona vraća na ponovno razmatranje i dostavljanje novog mišljenja.

Ad. 14. Izjašnjavanje Doma o zahtjevu Komisije za saobraćaj i komunikacije za dostavljanje Izvještaja o Prijedlogu zakona o poštama BiH

Nije bilo rasprave.

Dom je odobrio produženje roka za dostavljanje Izvještaja o Prijedlogu zakona o poštama do 27. aprila 2009. godine.

Ad. 15. Prijedlog revidirane strategije Bosne i Hercegovine za provođenje Aneksa VII. Dejtonskog mirovnog sporazuma (prijedlog Vijeća ministara BiH)

U uvodnim napomenama predsjedavajući Belkić podsjetio je na Mišljenje Zajedničke komisije za ljudska prava, prava djeteta, mlade, imigraciju, izbjeglice, azil i etiku i naglasio da su sjednici prisutni predsjedavajući Vijeća ministara BiH i resorni ministar za ljudska prava i izbjeglice.

Povodom Strategije, izlaganja Domu podnijeli su predsjedavajući Vijeća ministara BiH Nikola Špirić i ministar za ljudska prava i izbjeglice BiH Safet Halilović.

U okviru ove tačke vođena je duža rasprava u kojoj su učestvovali: Niko Lozančić, Bakir Izetbegović, Šefik Džaferović, Slavko Jovičić, Azra Hadžiahmetović, Sadik Ahmetović, Ekrem Ajanović, Milorad Živković, Mirko Okolić, Momčilo Novaković, Remzija Kadrić, Jozo Križanović, Martin Raguž, Savo Erić, Denis Bećirović i Branko Dokić. Poslije rasprave, ponovo je govorio ministar Safet Halilović.

U raspravi su zaključke predložili: Sadik Ahmetović, Remzija Kadrić, Jozo Križanović, Savo Erić i Denis Bećirović.

Prilikom glasanja, Drago Kalabić predložio je da se odgodi izjašnjavanje o Prijedlogu revidirane strategije, a da se predloženi zaključci upute nadležnoj komisiji na usaglašavanje.

Predsjedavajući je ovaj prijedlog zaključka dao na glasanje. "Za" je glasalo 30 (Federacija BiH 21, RS devet), "protiv" je glasao jedan poslanik.

Predsjedavajući je konstatirao da je usvojen zaključak da se odgoda izjašnjavanje o Prijedlogu revidirane strategije i da se prijedlozi zaključaka upućuju nadležnoj komisiji na usaglašavanje zajedno s predlagачem Strategije.

Ad.16. Izvještaj o radu i poslovanju Radiotelevizije BiH za 2007. godinu

Predsjedavajući Belkić je u uvodnim napomenama podsjetio na aktivnosti koje su u Kolegiju i komisijama vođene u vezi s ovim izvještajem, te naglasio da je Komisija predložila odgovarajuće zaključke o kojima Dom treba da se izjasni.

U ime Komisije, kratko je govorio njen predsjedavajući Branko Dokić.

Nije bilo rasprave.

Prilikom glasanja, Dom je, sa 33 glasa "za" (Federacija BiH 21, RS 12) i jednim "suzdržanim", usvojio zaključke koje je predložila nadležna komisija, a koji glase:

1. Predstavnički dom Parlamentarne skupštine BiH traži od Upravnog odbora Radiotelevizije BiH da mu do kraja aprila 2009. godine dostavi izvještaj o radu i poslovanju Radiotelevizije BiH za 2007. i 2008. godinu i izvještaj o radu Upravnog odbora za isti period.

2. Predstavnički dom Parlamentarne skupštine BiH traži od Upravnog odbora RTVBiH da mu do kraja aprila 2009. godine dostavi plan sanacije i konsolidacije poslovanja Radiotelevizije BiH.

Ad. 17. Izvještaj o finansijskom poslovanju Radiotelevizije BiH u 2007. godini

Predsjedavajući je rekao da je ista situacija i u ovoj kao i u prethodnoj tački, s tim što je Izvještaj o finansijskom poslovanju u nadležnosti Komisije za finansije i budžet, koja je predložila slične zaključke.

Nije bilo rasprave.

Sa 32 glasa "za" (Federacija BiH 20, RS 12) i dva "suzdržana", usvojeni su zaključci koje je predložila Komisija za finansije i budžet, sljedećeg sadržaja:

1. Predstavnički dom Parlamentarne skupštine BiH traži od menadžmenta i Upravnog odbora Radiotelevizije BiH da do kraja aprila 2009. godine sačine i dostave izvještaje o finansijskom poslovanju Radiotelevizije BiH za 2007. i 2008. godinu.

2. Predstavnički dom Parlamentarne skupštine BiH traži od Upravnog odora Radiotelevizije BiH da do kraja aprila 2009. godine dostavi Predstvničkom domu plan sanacije i konsolidacije Radiotelevizije Bosne i Hercegovine.

Ad. 18. Izvještaj o radu komisija Predstavničkog doma za 2008. godinu:

- a) Ustavnopravne komisije,
- b) Komisije za vanjske poslove,
- c) Komisije za vanjsku trgovinu i carine,
- d) Komisije za finansije i budžet,
- e) Komisije za saobraćaj i komunikacije,
- f) Komisije za ostvarivanje ravnopravnosti spolova.

Poslije kraćih uvodnih napomena predsjedavajućeg, nije bilo rasprave.

Dom je jednoglasno, s 36 glasova "za" (Federacija BiH 24, RS 12), usvojio izvještaje o radu stalnih komisija Predstavničkog doma u 2008. godini.

Ad. 19. Izvještaj o radu zajedničkih komisija za 2008. godinu:

- a) Zajedničke komisije za odbranu i sigurnost BiH,
- b) Zajedničke sigurnosno-obavještajne komisije za nadzor nad radom Obavještajno – sigurnosne agencije BiH,
- c) Zajedničke komisije za ekonomske reforme i razvoj,
- d) Zajedničke komisije za evropske integracije,
- e) Zajedničke komisije za administrativne poslove,
- f) Zajedničke komisije za ljudska prava, prava djeteta, mlade, imigraciju, izbjeglice, azil i etiku.

Poslije uvodnih napomena predsjedavajućeg, u okviru ove tačke govorio je Mirko Okolić i predložio Domu na usvajanje zaključak u vezi s obavezom predsjedavajućeg Vijeća ministara BiH i Predsjedništva BiH za dostavljanje određenih informacija.

Prilikom glasanja Dom je, sa 34 glasa "za" (Federacija BiH 23, RS 11) i dva "suzdržana", usvojio izvještaje o radu zajedničkih komisija oba doma za 2008. godinu.

Na prijedlog Mirka Okolića, jednoglasno je, sa 33 glasa "za" (Federacija BiH 21, RS 12), usvojen sljedeći zaključak:

Na osnovu Zakona o Obavještajno-sigurnosnoj agenciji BiH, Predstavnički dom Parlamentarne skupštine BiH traži od predsjedavajućeg Vijeća ministara BiH i Predsjedništva BiH da ispune svoje obaveze iz Zakona o Obavještajno-sigurnosnoj agenciji BiH u pogledu blagovremenog dostavljanja izvještaja, informacija i Godišnje platforme o obavještajno-sigurnosnoj politici.

Ad. 20. Izvještaj o radu Ureda za razmatranje žalbi za 2008. godinu

Predsjedavajući je u uvodnim napomenama podsjetio na Mišljenje Komisije za finansije i budžet o Izvještaju iz ove tačke i zaključke koje predlaže Komisija.

U raspravi su učestvovali Savo Erić i Šemsudin Mehmedović. Mehmedović je predložio usvajanje zaključaka u dvije tačke.

Prilikom glasanja, Dom je usvojio Izvještaj o radu Ureda za razmatranje žalbi za 2008. godinu, s Mišljenjem nadležne komisije i zaključcima predloženim u Mišljenju. "Za" je glasao 31 (Federacija BiH 20, RS 11), a "suzdržala" su se četiri poslanika.

Zatim je Dom, sa 32 glasa "za" (Federacija BiH 23, RS devet) i četiri "suzdržana", usvojio zaključke koje je predložio Šemsudin Mehmedović.

Prema tome, povodom Izvještaja o radu Ureda za razmatranje žalbi, usvojeni su sljedeći zaključci.

1. Zadužuje se Vijeće ministara BiH da u okviru svojih nadležnosti preduzme aktivnosti potrebne za stupanje na snagu Pravilnika o unutrašnjoj organizaciji Ureda za razmatranje žalbi.

2. Zadužuje se Vijeće ministara BiH da riješi sva neriješena pitanja u Uredu za razmatranje žalbi, a koja se tiču neusklađenosti Pravilnika o unutrašnjoj organizaciji Ureda, te da osigura uživanje svih prava koja proizilaze iz radnopravnog statusa zaposlenih u ovom uredu.

3. Zadužuje se Vijeće ministara BiH da sve podzakonske akte vezane za rad Ureda za razmatranje žalbi uskladi s pravnom tečevinom EU.

4. Predstavnički dom Parlamentarne skupštine BiH nalaže Uredu za razmatranje žalbi da u narednom izvještaju o radu upozna Komisiju s rokom u kojem su rješavane žalbe zaprimljene u Uredu.

Zaključke pod brojem 2. i 3. predložio je poslanik Šemsudin Mehmedović.

Ad. 21. Izvještaj Zajedničke komisije o nastojanju za postizanje saglasnosti o identičnom tekstu Zakona o dopuni Zakona o Javnom radiotelevizijskom sistemu BiH

Predsjedavajući je podsjetio da je Zajednička komisija postigla saglasnost o Prijedlogu zakona o dopuni Zakona o Javnom RTV sistemu usvajanjem dva amandmana.

Nije bilo rasprave.

Sa 32 glasa "za" (Federacija BiH 23, RS devet) i četiri "suzdržana", usvojen je Izvještaj Zajedničke komisije.

Ad. 22. Informacija o poplavama u Popovom polju, rijeci Krupi i na području Hutovog blata (podnosilac: Ministarstvo vanjske trgovine i ekonomskih odnosa BiH)

Predsjedavajući Belkić podsjetio je da je Informaciju iz ove tačke razmatrala Komisija za vanjsku trgovinu i carine i dostavila mišljenje s prijedlogom zaključaka.

Poslije uvodnih napomena predsjedavajućeg, Domu je izlaganje podnio ministar vanjske trgovine i ekonomskih odnosa BiH Mladen Zirojević.

U raspravi su učestvovali: Martin Raguž, Momčilo Novaković, Selim Bešlagić, Velimir Jukić, Slavko Jovičić, Ekrem Ajanović i Jozo Križanović.

U raspravi je Martin Raguž predložio sljedeći zaključak:

Mišljenje Komisije za vanjsku trgovinu i carine o Informaciji o poplavama u Popovom polju, rijeci Krupi i na području Hutovog blata vraća se Komisiji i daje se dodatni rok za izradu konačnog mišljenja koje će uključiti obilazak prostora (hidroelektrane, općine, agencije) delegacije koju će odrediti Komisija za vanjsku trgovinu i carine, a u koju će se uključiti predstavnici Predstavničkog doma i Ministarstva vanjske trgovine i ekonomskih odnosa BiH.

Kako ovaj zaključak isključuje zaključke koje je predložila Komisija, predsjedavajući je prilikom glasanja prvo na izjašnjavanje dao ovaj zaključak.

Zaključak je usvojen sa 32 glasa "za" (Federacija BiH 20, RS 12) i jednim "suzdržanim".

Ad. 23. Promjene u članstvu komisija Doma

Predsjedavajući Belkić je u uvodnim napomenama rekao da je Klub SNSD-a dobio novog poslanika i da predlaže da se Željko Kuzmanović imenuje za člana:

- Komisije za vanjsku trgovinu i carine i
- Komisije za saobraćaj i komunikacije.

Prijedlog Kluba SNSD-a usvojen je sa 32 glasa "za" (Federacija BiH 21, RS 11) i jednim glasom "protiv".

Ad. 24. Davanje saglasnosti za ratifikaciju:

- a) Sporazuma o naučnotehničkoj saradnji između Vijeća ministara BiH i Vlade Crne Gore,
- b) Sporazuma o finansiranju između Bosne i Hercegovine i Komisije Evropskih zajednica u pogledu prekograničnog programa između Bosne i Hercegovine i Crne Gore za 2007. godinu, na osnovu instrumenta za prepristupnu pomoć, komponenta II – prekogranična saradnja,
- c) Aranžmana između Vijeća ministara BiH i Vlade Republike Koreje vezano za zajam iz sredstava Fonda za unapređenje ekonomske saradnje,
- d) Sporazuma između Vijeća ministara BiH i Vlade Republike Bugrske o međunarodnom drumskom prijevozu putnika i roba,
- e) Sporazuma između Kraljevine Belgije i Republike Albanije, Bosne i Hercegovine, Republike Hrvatske, Bivše Jugoslovenske Republike Makedonije, Republike Moldavije, Crne Gore, Republike Srbije i Misije za privremenu upravu UN-a na Kosovu, u ime Kosova, u skladu s Rezolucijom Vijeća sigurnosti UN-a 1224 o privilegijama i imunitetima Sekretarijata Sporazuma o slobodnoj trgovini u Centralnoj Evropi,
- f) Ugovora o izvedbama i fonogramima Svjetske organizacije za intelektualno vlasništvo i
- g) Ugovora o autorskom pravu Svjetske organizacije za intelektualno vlasništvo.

Predsjedavajući je u uvodnim napomenama podsjetio da je nadležna Komisija za vanjske poslove dala pozitivno mišljenje o svim aktima i predložio da se vodi jedinstvena rasprava.

Nije bilo rasprave.

Izvršeno je glasanje u paketu.

Dom je jednoglasno, s 36 glasova "za" (Federacija BiH 24, RS 12), dao saglasnost za ratifikaciju svih akata iz ove tačke.

Sjednica je završena u 18,30 sati.

Sastavni dio Zapisnika je transkript 50. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
Beriz Belkić